

समं. 09.20 Hrs

<><><><><><>

Headlines

- उपराज्यपाल मनोज सिन्हा होंरें स्किम्स सौरा च आयोजित समारोह दरान डॉक्टरी अमले दी सराहना कीती ते जम्मू-कश्मीर च सेहत क्षेत्र च पिछले 7एं बरें दरान आंदे गेदे सुधारें गी उजागर कीता।
- मुखमंत्री उमर अब्दुल्ला होंरें 17मीं साहसिक सैलसफा कन्वेंशन दा पूर्व अवलोकन कीता, गुलमर्ग च एशिया दी सभनें शा लम्मी स्की ड्रैग लिफ्ट दा उद्घाटन कीता।
- जल शक्ति मंत्री जावेद अहमद राणा होंरें राजौरी ते पुंछ जिलें च बिजली ढांचें, सिंचाई सुविधाएं ते पन बिजली परियोजनाएं दी समीक्षा कीती।
- जम्मू-कश्मीर केंद्र शासित प्रदेश च लग्गी दी चौथी राष्ट्री लोक अदालत च कोई 91 ज्हार कोला मते मामलें दा नबेड़ा कीता गेआ।
- जम्मू प्रांतै दे सोए आहले जोन च स्याले दियां छुट्टियां बारी-बारी सिर पाने दी घोशणा।

<><><><><><>

उपराज्यपाल मनोज सिन्हा होंरें होंरनें दा ख्याल, इलाज ते दिक्खभाल करने च डॉक्टर समुदाय दे समर्पणभाव, दया-भावना ते निजी योगदान गी सराहना कीती ते आखेआ जे राष्ट्र दे विकास च इन्दे योगदान दा बी कोई मकाबला नेई ऐ। कल श्रीनगर च शेर-ए-कश्मीर आयुर्विज्ञान संस्थान दे सलाना उत्सव हफते दे समापन समारोह गी संबोधित करदे होई एल.जी होंरें आखेआ कि जम्मू-कश्मीर 2019 दे बाद सेहत ढांचे ते सेवाएं दे क्षेत्र च बड्डे पैमाने पर बदलाव ते सुधार दिक्खने गी लब्बा ऐ ते अज्ज केंद्र शासित प्रदेश च रौहंदे होई म्यारी सेहत सेवां, वाजब खर्चे पर हासल करी सकना मूर्त रूप लेई चुके दा ऐ। मेडिकल दे क्षेत्र च सुधार गी उजागर करदे होई उनें आखेआ जे पिछले 4 बरें दरान एम.बी.बी.एस दियां सीटां बधाइयां गेइयां न जेहदे नै सभनें लेई सेहत आहला सुखना मूर्त रूप लेई सकदा ऐ।

<><><><><><>

CM-Gulmarg

मुख्यमंत्री उमर अबदुल्ला होंरें कल एडवेंचर टूर आप्रेटर्स एसोसिएशन ऑफ इंडिया दे 17में सलाना सम्मेलन दा पूर्व अवलोकन कीता। राष्ट्री सतह दा एह आयोजन 17 कोला 20 सितंबर धोड़ी कीता जा'रदा ऐ। इस कन्वेंशन दी मदद कन्नै जम्मू-कश्मीर दी साहसिक सैलसफा दे क्षेत्र च इक टकोहदी ते बकखी पंछान बनी जाहग। मुख्यमंत्री होंरें मसनुई बर्फ तयार करने ते स्कींग लेई तेज रौशनिएं आहले रसते दी बवस्था गितै नमिएं तकनीकें दा इस्तेमाल करने पर जोर दिता। उनें आखेआ जे इस चाल्ली दे उपाएं ते बवस्थाएं कन्नै गुलमर्ग च स्कींग गी इक नमा उछाल थहोग ते मकामी सतह पर कम्म रोजगार ते आर्थिक गतिविधिएं गी बी बढ़ावा थहोग। मुख्यमंत्री होंरें इस मौके एशिया दी सभनें शा लम्मी स्की ड्रेग लिफ्ट दी शुरूआत बी कीती

जेहदी लम्बाई 726 मीटर ऐ। काँगदूरी थाहर एहदा निर्माण 3 करोड़ 65 लक्ख रपे दी लागत कन्नै कीता गेदा ऐ।

<><><><><><>

CM-Gulmarg

जल शक्ति मंत्री जावेद अहमद राणा होरें कल सिविल सचिवालय च लग्गी दी इक बैठक दी अध्यक्षता करदे होइ पुंछ ते राजौरी जिले च बिजली, सिंचाई ते पन-बिजली परियोजनाएं दी समीक्षा कीती। उनें बिजली ते सिंचाई लेई पानी दी सप्लाई यकीनी बनाने दे अलावा सिओर रिसेविंग स्टेशन ते परनाई पन बिजली परियोजना गी तौले तोड़ चाढ़ने पर बी जोर दिता।

<><><><><><>

CS-Jagti

मुख्य सचिव अटल डुल्लू होरें कल मिनी जगटी कालोनी दा दौरा लाइयै विकास कम्में दी समीक्षा कीती ते किश महत्वपूर्ण परियोजनाएं दा उद्घाटन बी कीता। उनें उप जिला अस्पताल, सरकारी हायर सैकेंड्री स्कूल ते उत्थै बनाए जा'रदे बहुउद्देशीय समुदायिक हाल दा निरीक्षण करने दे अलावा 5 बोरवेल्लें दा उद्घाटन बी कीता। उनें बक्ख-बक्ख समाजी सुरक्षा स्कीमें तैहत मंजूरी दे दस्तावेज बी सौंपे ते विस्थापित लाभार्थिणं गी हट्टिए ते रिहायशी क्वाटरें दे लाटमेंट आडर बी उन्दे सुपुर्द कीते।

<><><><><><>

4th Tawi Bridge

हून इक जरूरी सूचना। जम्मू च भगवती नगर आहले चौथे तवि पुल पर लुक पाने दे कम्मै दी पछौकडै च मोटर गड्डिएं आहलें गी सलाह दिती गेई ऐ जे ओह अज्ज भगवती नगर आहले पुल परा लग्गने दे बजाय बिक्रम चौक आहले तवि पुलें दा इस्तेमाल करन तां जे कुसै चाल्ली दी दिक्कत-परेशानी दा सामना नेई करना पवै। इस बारै कुसै बी जानकारी जा सहायता लेई टी.सी.यू जम्मू गी 0191-2459048 या टोल फ्री नंबर 103 पर संपर्क कीता जाई सकदा ऐ।

<><><><><><>

Lok Adalat

जम्मू-कश्मीर च जंदे रोज लग्गी दी चौथी ते अखीरी राश्ट्री लोक अदालत-2025 दरान 91 जहार शा मते मामलें दा नबेड़ा कीता गेआ। लोक अदालत दा आयोजन मुख न्याधीश अरुण पल्ली हुं'दी दिक्ख-रिक्ख ते जस्टिस संजीव कुमार हुं'दे मार्गदर्शन च कीता गेआ। पूरे केंद्र शासित प्रदेश च 186 बेंचें आसेआ कुल 1 लक्ख 5 जहार शा मते मामलें दा नबेड़ा कीता गेआ। मोटर हादसे, दीवानी, फौजदारी, घरेलू झगड़े ते चेक बाउंस कन्नै जुड़े दे मामलें दा नबेड़ा कीता गेआ ऐ जेहदे च कुल 76 करोड़ रपे कोला मते दा मुआवजा दिता गेआ ऐ। कनूनी सेवाएं सरबंधी प्राधिकरण नै लोक अदालत दे कामयाब आयोजन लेई सभनें सरबंधत धड़ें दा धन्नवाद कीता ऐ।

<><><><><><>

Winter-Vacation

स्कूली शिक्षा निदेशालय जम्मू नै जम्मू संभाग दे सोए दे इलाके च सभनें सरकारी ते मानता हासल निजी स्कूलें लेई स्याले दिएं छुट्टिएं दी घोशणा कीती ऐ। निदेशालय आसेआ जारी हुकमै मुजब प्री-प्राइमरी थमां लेइयै 5मीं जमात तगर दे विद्यार्थिएं लेइ 22 दिसंबर 2025 थमां 10 जनवरी 2026 तगर स्याले दियां छुट्टियां होडन। 6मीं थमां 8मीं जमात दे विद्यार्थिएं लेई छुट्टियां 26 दिसंबर 2025 कोला 10 जनवरी 2026 तगर होडन जिसलै कि 9मीं थमां 12मीं जमात दे विद्यार्थिएं लेई 29 दिसंबर 2025 कोला 10 जनवरी 2026 तगर स्याले दी छुट्टी होग। हुकमै च सभनें अध्यापकें गी निर्देश दिता गेआ ऐ जे ओह छुट्टी दरान लोड़ पौने पर शैक्षणिक गतिविधिं लेई उपलब्ध रौहन ते 10 जनवरी 2026 गी अपने स्कूलें च परतोई जान।

<><><><><><>

Weather

तोआई, मौसम विभाग नै आखेआ ऐ जे अज्जै थमां लेइयै 17 दिसंबर तगर उत्तर ते मध्य कश्मीर दिये उच्ची थाहें आहले इलाकें च बड़ी हौली बर्फबारी होने दी मेद ऐ। अगले किश दिनें दरान घाटी च कई थाहें पर हल्की शा दरम्यानी धुंध पौने दी बी मेद ऐ।

<><><><><><>

Cyber Police Statino

रामबन जिला पुलस नै साइबर अपराधें कन्ने असरदार ढंगे कन्ने निब्बडने ते पीड़ितें दी मदद लेई इक साइबर पुलस स्टेशन कायम कीता ऐ। डोडा-किश्तवाड़-रामबन रेंज दे डी.आई.जी श्रीधर पाटिल होरें कल बटोत च थाना दिवस कार्यक्रम च बोलदे होई एह जानकारी सांझी कीती। उनें

आखेआ जे इस पहलकदमी दा मकसद साइबर सुरक्षा गी बधाना ते शकैतें दा फौरी तौरा पर नबेड़ा करना ऐ। डी.आई.जी होरें इब्बी दस्सेआ जे 'भरोसा' अभियान दे तैहत घरेलू हिंसा दा सामना करा'रदियां मती सारी महिलां राश्ट्री टोल फ्री हेल्पलाइन नंबर 1930 राएं मदद हासल करा'रदियां न।

<><><><><><>